

備塞外也亦以防中國姦邪放縱出為寇害故明法度

以專衆心也敬諭單于之意

師古曰言已曉知其意也

朕無疑焉為

單于怪其不罷故使大司馬車騎將軍嘉曉單于單于

謝曰愚不知大計天子幸使大臣告語甚厚初左伊秩

訾為呼韓邪畫計歸漢竟以安定其後或讒伊秩訾自

伐其功常鞅鞅

師古曰伐謂矜其功力

呼韓邪疑之左伊秩訾懼

誅將其衆千餘人降漢漢以為關內侯食邑三百戶令

佩其王印綬

師古曰雖於漢為關內侯而依匈奴王號與印綬

及竟寧中呼韓

邪來朝與伊秩訾相見謝曰王為我計甚厚令匈奴至

今安寧王之力也德豈可忘我失王意使王去不復顧